

四庫全書

史部

欽定四庫全書

續資治通鑑長編卷二百九十四

宋 李燾 撰

神宗

元豐元年十一月辛未朔以翰林學士兼侍讀知審官  
西院兼提舉在京諸司庫務許將權發遣開封府以蘇  
頌干涉孫純等獄事且自請罷職故也尋詔如頌當參  
對特免追攝

免追攝乃癸酉詔今并書

新知潤州呂嘉問言昨案

發江寧府簽書判官張偓佺違法事竊知權簽書判官  
潘令先夜入右司理院取去見勘偓佺案及帶偓佺舊  
廳公人并見禁罪人親戚赴右司理院併淨牢獄竊虞  
誘脅變亂情實乞下別路差官詔潘令先具析又言何  
琬自準朝旨劾臣追臣所使令殆遍若臣有違法理必  
難逃觀琬行遣多不循理法必是令部內官吏協同鍛  
煉乞早賜移勘及許臣檢取照用文字以備辯答詔送  
江南東路監司提舉司又言準勅令臣具何以知琬案

發事九月中前江寧府通判杜行送人回府稱行密令  
白臣昨在東府客次見衆人談學士妄用公使錢修造  
為監司所案發及進士吳愿言見提舉官朱炎子浚明  
說琬言臣為門僧教化拆鎮淮橋修精義堂及不造監  
司商量公事而數至王安石之門安石亦厭其來又得  
在京市易務監華申甫書所報如愿言臣皆未敢為信  
尋聞有朝旨下轉運司案劾臣謂提點刑獄王安上當  
知其詳遂詢其兄安石安石稱聞琬所言亦相連及上

批慮有事干涉中書吏人可實封送御史臺根究公事  
所

壬申詔諸路都總管司所在本州官及過往止令本州  
供給兵官使臣軍員令總管司供給仍令都副總管同  
主管如副總管司錢少即于本州公使錢內添給之

詳定禮文所言郊祀壇域當依儀注設三壇撤去青繩  
又言郊祀天地席當以橐鞬配帝以蒲越撤去黃褥緋  
褥又言享宗廟當用制幣及依儀注燭蕭又言遇雨望

祀當服祭服仍設樂又言分獻官不當先期升壇當依儀注又言南郊式監祭監禮俱立于壇南非是請分監祭立于壇之西北東向監禮立于東北西向

此二事據禮文皆十

一月五日依奏實錄不取今增入

又言景祐中裁定袞冕制度已與古

合今少府監進樣不應禮請改用朱組為紘玉筭玉瑱以元純垂瑱以五采玉貫于五采藻為旒以青赤白黃黑五色備為一玉每一玉長一寸前後二十四旒垂而齊肩其表裏皆用繒又言服裳皆前三幅後四幅今以

八幅為之不殊前後又佩玉及綬并章服皆不如古制  
當改正又言百官雖不執事以朝服侍祠非是當並服  
祭服如所考制度修製五冕及爵弁服各正冕弁之名  
又言天子六服自鷩冕而下今既不親祠廢而不用則  
諸臣攝事當依周禮從王所祭之服又言六冕並用赤  
舄六冕並用赤舄禮文在四年十月六日今并入此又言景靈宮太廟南郊儀  
注並云祀前三日儀鸞司鋪御坐黃道褥黃道褥設于  
郊廟非是詔黃道褥不設餘皆從之

郊廟禮文自有本書今但舉其要而

削其繁辭實錄于三年七月十六日丁丑乃書郊廟不設黃道褥今兩存之禮大三年八月十一日又詔明堂不設黃道褥實錄亦不別出今附此

癸酉分命輔臣祈雪 江寧府制院言鞫口嘉問等事

恐推拒拖延乞先斷王覺贓濫并官吏踰違等罪其嘉問事別為一案根治詔王安上朱炎已不許回避令同繫書以聞

甲戌詔太宗正司見監守鎖閉皇族克頌免鎖閉其監守如故 經制熙河邊防財用司言近有旨許岷州以



舊錢本回易管設蕃部緣河岷州已有公使錢外更有  
管設錢乃惟岷州許回易乞更賜指揮詔罷岷州回易  
其河岷州管設錢舊各二千緡令岷州更增二千緡河  
州半之並給經畧司錢專犒設蕃部探刺邊事仍不得  
別支用 都水監言乞下京西差夫一萬赴汴口限一  
月開修河道詔止差七千人

乙亥宣徽南院使王拱辰乞依二府例賜墳寺敕額歲  
度僧一人詔旨以拱辰歷事三朝累經內外清要繁劇

特從其請不得為例又賜方團金帶拱辰辭之

辭帶十六日丙

戎事今并載此劉摯行狀亦并載兩事為異禮獨不云辭帶也

提舉廣南西路常平

等事劉誼言近準朝旨下提點刑獄司劾本路轉運使

張頡頡由此忿躁凌辱官吏甚于前日桂州司理叅軍

沈竦因白公事頡罵竦為賊怒竦分說以至今軍士捽

抑之詔張頡罷任於潭州供答文字及具析劉誼所奏

事理以聞經制熙河路邊防財用司請移岷州滔山

鎮錢監于岷州置鐵錢監及通遠軍威遠鎮錢監改鑄

銅錢比之冶鐵歲收淨利十四萬餘緡仍乞取永興軍  
華州鐵監作匠教習詔移滔山鎮錢監依奏外餘令本  
路轉運司相度以聞其後轉運司所奏未至而財用司  
復列十事來上通遠軍威遠鎮改鑄事即其一也乃從  
之

熙寧九年五月置滔山監

詔近分配殿前步軍司標排手教頭

五十九人可令逐司所管槍手均選矯捷輕健堪教之  
人每名各教九人令阮根往來巡視指教賈逵燕達案  
閱候教成日取旨引見後賈逵燕達等言近降東南隊

法五人為一小隊一人排手二人槍手二人弩手五小  
隊為一中隊兩中隊為一大隊今阮根反以八人為一  
隊又減大排一增小排二減弩一增弓二與東南所用  
器仗不同乞止依東南隊法以弩手代小排若去敵稍  
遠則施箭鑿近則左手持弩如小排架隔次第右手執  
刀劈斫庶與長兵相兼從之仍令槍手兼習標本志十  
月賈遠  
燕達等言近議者增損東南排弩隊法與東南所用兵  
械不同請止依東南隊法以弩手代小排若去敵稍遠  
則施箭鑿近則左手持弩如小排架隔右手執刀以備  
斬伐長兵相參可以為用詔可其槍手仍以標兼習

西頭供奉官曹暎為閤門看班祇候先是看班有闕  
樞密院擬西頭供奉官向緯而令暎候闕詔宜先差暎  
以緯皇后之叔雖先得旨而暎乃太皇太后之從孫也  
甲申分命輔臣祈雪 賜度僧牒千為修完都城諸門  
瓦木工直之費令三年印給 又詔江南東路監司提  
舉司見同鞫呂嘉問等事其何琬以有嫵不預宜令江  
南西路提點刑獄李茂直同劾 上批捕廕遇兵暴露  
日久冒壁山險實甚勞苦今賊已敗獲各分屯歸所在

宜各賜特支錢諸効用人比類給之又詔詹遇等昨自潭州竄洪筠袁吉復犯湖南郴衡兩州近據逐處奏彭孫等已全火殺獲宜令孫頑牒所屬監司遣官體量應賊所經歷地分為賊殺略焚蕩民戶等第蠲稅其免役錢亦倚閣或量蠲減已經倚閣者更展限其常平錢穀準此內貧闕民戶仍與接續賑貸應收獲賊內刼財物孳畜速召人識認責保給付其被驅率婦女令放逐使人給路費錢千無親屬收認者遣人轉達其家有嘗受

寄賊賊之家揭榜限半月首納 西上閤門使忠州團

練使涇原路馬步軍總管都大經制瀘州夷賊公事韓

存寶言九月辛卯

二十日

討夷賊至十月辛亥

十日

回軍攻

破賊後城等十三國除歸降外並已焚蕩斬首級五百

七十餘獲生口百餘得猪牛及銅鼓標排噐甲各千餘

見領兵赴瀘州相度分屯上批存寶已討蕩夷賊令速

上功狀又批涇原路所遣兵馬非久分屯並與特支路

費錢具隣路所差義軍藥箭弩手視廂軍之數

乙酉皇第八子生遣嘉王頊告于太廟

四年五月薨賜名侗舊紀書皇

子侗生新紀不書

太學生鍾世美為試校書郎睦州軍事推

官太學正世美以內舍生上書稱旨下國子監保明在

學行義亦飭故也或刻世美書印賣上批世美所論有

經制四夷等事傳播非便令開封府禁之

世美何許人

又

詔聞京西河北陝西諸路自冬無雪並邊山田麥苗已

旱令轉運司訪名山靈祠委長吏祈禱又詔聞熙河

路商貨所至州軍並市易司權買令提舉成都府路茶



場司李稷體量後稷言熙河岷州通遠軍等處商販匹帛等經制司實令市易務拘買乃詔李憲具析以聞

衛尉寺丞知三泉縣莊黃裳言本縣當益梓利夔四路之衝昨議者請廢北路復褒斜故道以減程驛且寬漢中輸納之勞今日較之為害乃甚于前日其川茶自行法以後興利搬運不行幾二萬馱望下陝西及利州路轉運司并提舉茶場司相度詔委劉忱李稷同比較利害以聞初三泉縣之金牛鎮有東北兩路北通陝西秦

鳳熙河京西諸州東通梁洋熙寧七年提點刑獄范百  
祿建言廢北路復褒斜路久之鳳州以為往來迂險官  
私受弊乞裁河池兩當二里三驛復河池舊路而陝西  
路都轉運司秦鳳路經畧安撫司亦皆以為言至是黃  
裳疏其利害甚悉廼委忱等比較後忱等言新路視舊  
路雖名減兩程其鋪兵遞馬皆增于舊又卒亡馬死相  
尋官吏驛券給請亦倍舊路雖號十程比新路纔遠八  
里且多平易新路雖減科發洋州稅米四千餘石及移

撥興元府鳳州稅米二萬餘石

按此處疑有脫文

今若行河池

舊路遷復馬遞鋪官舍亭驛略加完整即自如故兼可

減河池兩當二里三驛詔三驛不減餘並從之詔知揚

州鮮于侁知滁州蔡延慶權知戎州呂開權廣西轉運

副使苗時中右贊善大夫蔡勝各罰銅二十斤權知唐

州范百祿知寧州盧洪洋州興道縣令安漸各罰銅十

斤並坐嘗建此議故也

元豐三年八月二十五日侁等乃罰銅朱本入此今從之

詔未差教授州軍及縣學有講書并職掌處委長吏及

本學管勾官共選有學行舉人充教授其學糧依舊以  
贍生徒時河北轉運司請以無教授處學糧增助有處  
給用下國子監相度而有是詔 詳定禮文所言古者  
大帶天子諸侯大夫士采飾單合皆不同今羣官助祭  
服一以緋白羅為之無等降之別又言中單亦殊不應  
禮並乞據禮改正詔送禮院 中單送詳定所再詳定乃  
元豐元年十一月五日詳

定所具奏則無月日大帶亦並無月  
日今并附十一月五日更徐考之

白虹貫日

丙戌三司言寶文閣學士陳薦請給未有例寶文閣學

士在天章閣學士之下樞密直學士之上今欲就天章閣學士例載之祿令其直學士待制亦增入從之提舉成都府路茶場司言欲割永寧寨額茶一千五百駄立為河州茶場額仍分年額酬賞與河州監官及本司近分官茶往諸州所總縣鎮出賣其酬賞亦乞准此所有階州水洛城其餘未曾立額賣茶場務監官乞候年終並以熙寧十年課利比較從之

丁亥新權發遣永興軍等路常平等事李孝博言泰熙

州自置市易乃提舉官汲逢專領從初措置絕無統紀  
今本務欠錢十二萬餘緡無主名已送所司推治及聞  
逢母與母族亦嘗貸借不容逢有不知兼元驅磨官楊  
清卿稱逢有虛增錢數七萬餘緡詔汲逢先勒停令開  
封府遣人押送秦州制院孝博于陝西路選差獄官與  
衛尉寺丞知三泉縣莊黃裳同鞠之因徙孝博提舉秦  
鳳等路常平仍令提舉催促本路州軍諸處官司應干  
市易本息借與人戶見欠錢物

徙秦鳳乃戊子  
日事今并此

河東

路經畧司準中書送下權同管勾河東緣邊安撫司王  
崇拯言豐州永安保寧三寨地昨與西界首領商量分  
定以沙阿為界委官標量合耕地三十頃有畸乞下本  
司更令按視募弓箭手耕治本司今欲依崇拯奏施行  
從之韓存寶言羅胡苟姓作過夷賊係八母姓共五  
十六村除已討殺及投降外有四十七村內四十二村  
累次各以銅鼓器甲水牛等銜草乞命投降及獻逐村  
地土歲認租稅尚有斗忙箇斗等五村未降據招安將

楊方簡等稱各攜其家人遠遁今見官軍在納溪寨實  
驚懼未敢出漢今且以降夷村分頭領彊壯老小人口  
山坡水增地土逐年認納租稅仍各令打誓歸業依舊  
住坐訖詔請降夷人舊來納稅租者聽量納其已納者

止依舊額

二十  
四日

戊子詔自今非次替罷合登對官毋更令上殿 上批  
重修敕編所修海行敕令未成書又將委官刪定一司  
敕不惟次序失倫二書交舉亦廣占官吏去取難于照



類或致遺落切要事或與海行勅令相妨則人功廩賜亦所宜惜可令且併力修海行敕令俟成書以一司敕

相繼照會編修

二年六月二十四日當考

御史舒亶錄問同文館

制獄亶奏案情未圓慮致出入人罪詔知制誥蒲宗孟往制勘院同元勘官看詳所駁情節重推勘左諫議

大夫史館修撰安燾言東海之神已有王爵獨無廟貌乞于明州定海昌國兩縣之間建祠宇往來商旅聽助營葺從之仍令為屋百區司農寺請應以田宅借人

及保人物產用為抵當諸縣緩急錢物并米有不依限  
償納民戶欲別展限半年限滿不足以元供抵當平價  
召人買之官收其價錢如一年無人買即沒納所抵當  
償官尚有少數依條催理有羨聽給本主其沒納抵當  
依賣戶絕田產法從之

己丑命龍圖閣直學士史館修撰修國史宋敏求權御  
史中丞蔡確西上閣門使樞密副都承旨張誠一同修  
起居注直舍人院權同判太常寺李清臣詳定正旦御

殿儀注先是令敏求同閣門御史臺看詳上批以逐處  
官多議論難一恐曠日持久不能畢宜于御史臺閣門  
太常禮院各差一員與敏求詳定故也 中書言大宗

正司言宗諤狀稱孫女夫丁禧病狂乞罷親取嫁資及  
授官宣命本司看詳即無以夫病聽離條例詔特聽離  
丁禧更不追官 河東路經略司言本路編排置辦兩

九軍兵仗準詔專委權提舉河東路常平等事趙咸提  
舉別無詳經略司參豫明文詔經略司同提舉編排

直學士院錢藻撰進遣押醫官賜高麗國王王徽詔上  
批宜令許將孫洙更各撰一本以進尋命洙為翰林學

士

洙為學士在  
丙申今并書

右龍武軍大將軍郴州團練使吳國

公宗絳為光州刺史右龍武軍大將軍温州團練使宗

漢為慶州刺史以上批宗絳吳王元儼之孫宗漢濮安

懿王幼子皆特推恩也 御史何正臣言安燾陳睦使

高麗日以所得布馬易銀及於高麗界使人索驛料算

直害義辱命啓侮外藩望案治其罪追還所與恩命仍

詔高麗諭以使者失職之狀以慰遠人詔劄與肅睦令知

癸巳權發遣江淮等路發運副使蹇周輔兼提舉措置

福建路賣鹽及賊盜事

三年四月賣鹽司官吏並推賞

詳定正旦御

殿儀注所奏正旦朝會用黃麾仗及以車輅輿輦充庭

乞先頒降以本所祇應職掌及諸司排儀仗班次等人

赴大慶殿豫審度容布儀仗輦路等地具圖以聞詔車

輅未設餘依所請都水監言自曹村決溢後諸埽物

料遂無年計外準備乞支見錢二十萬緡趁時市梢草封樁如來年河埽無事自可充充次年從之 荆湖北

路轉運司言辰州界獠賊二十餘人焚劫叙浦縣民戶聞係丁先鋒殘黨沈七丁翼等未出首身居深險山洞臨高據隘官兵無由禦備乞立賞錢募獠人首領及諸色人捕掩如能殺獲丁翼等每級賞銀瓶三隻牛三頭鹽五十斤其次賊黨每級牛一頭鹽二十斤即能招降比類逐等十支二分兼獠賊雖屬辰州緣接沅州界乞

令知州謝麟亦遣兵誅討從之

甲午提點倉場司沈希顏請歲撥糴本錢二十萬緡付  
廣濟河輦運司糴糧赴京師如及四十萬石特與酬賞  
詔三司相度以聞 提舉福建路鹽事司言邵武軍鹽  
出賣甚易但闕兵夫運致乞支係省錢或役錢雇人從  
之 韓存寶言夷賊斗忙箇斗等五村續乞降已令歸  
業詔存寶分移斗忙箇斗九人往近裏州軍羈管如存  
寶已起離即具處置次第牒鈐轄司施行後存寶言作

過首領不止九人若依詔旨恐其餘降人驚疑乞且依先處置從之

十七日

乙未詔在京官司見監催欠罰銅錢並除放 韓絳言

北人郝景過南界擁場闢畫地圖已密遣人收捕詔定州路安撫司及河北緣邊安撫司指揮所遣人須察知姦細實狀方得收捕推鞠無致引惹生事 澶州言靈

平下埽閉口隄南實墊推動隄身乞下都水監修完已牒澶州都大司併力固護及十月甲寅本埽火夜起見



檢所燒木岍地步續奏詔權同判都水監楊汲相視隄防有合修處即具功料及火發次第以聞其放火賊令河北轉運司立賞錢五百千募人告捕

丙申軍器監言准敕應副陝西路將下并守禦軍器皆步乘運致聞闕少人車積下綱次所發軍器浩瀚若緣路散漫暴露枉有損壞又日發綱運亦慮積壓數多乞委官京西陝西轉運司府界提點司趣發從之

丁酉著作佐郎御史臺主簿何洵直兼詳定正旦御殿

儀注所檢討

朱本削去云小  
差除不當載

權江南東路轉運判官

何琬言呂嘉問奏報漏泄臣體量嘉問違法事月日異

同乞別根究詔送御史臺根究公事所

朱本削去云琬  
所言嘉問事各

已具載此逐時小  
可奏陳不必盡載

提點倉場司沈希顏乞以宗室百

官等合支草並給錢令開封界第四等戶體量納草錢

於本縣詔三司相度

朱本削去云事小  
兼方相度不須載

戊戌京西第一將劉元等乞馬軍教習不成退充步軍

又不成退充廂軍上批在京例且與展限限滿尚不能

學即如所奏京東西開封府界諸將下准此 荆湖南  
路安撫使謝景溫言看詳轉運司乞以邵州武岡等縣  
保丁於界上置鋪堡及木柵內弩手已發往關硤等寨  
者乞就本縣差填所置鋪堡並在辰州地界百里之內  
欲許保丁依條置合用器甲以備保聚教習詔鋪堡保  
丁事並從之其置兵器非在蠻界百里內者不用此法  
已亥知制誥直學士院錢藻為樞密直學士 詔軍器  
監戒勵弓作監官令三司遣官驅磨作匠有無稽違工

限減刻物料先是軍器監進弓上疑不如法式因命取教習馬軍所弓十張較其輕重長短與元付樣頗重而斗力稍閃又皆不同故也

十二月六日丙午席廷賞衛替可并此

宰臣

吳充王珪參知政事元絳言功臣非古始唐德宗多難之餘乃有奉天定難之號不應盛世猶襲陳迹況陛下即位以來上徽號至數十而不許臣等何功乃例蒙恩乞於銜位之中悉減罷詔答曰唐之中世時屬多虞制為功臣寵厥將吏因仍弗革稱謂實繁溢美過情空名

眩實施之近世或適權宜襲於來今固非通制卿等為  
國承弼惴惴無華帥先臣鄰願罷功號朕用嘉歎其敢  
弗從宜如所請於是知樞密院馮京等繼請從之遂詔

管軍臣僚以下至諸軍班衙內帶功臣者並罷

新舊紀並書罷

賜功臣號

都大提舉市易司言本司遣官以物貨往諸路

變轉乞十萬緡以上限二年二十萬緡限三年如一年  
內索及二分依遞年比較推恩限滿索及八分以上與  
理為任過限不及立定分數者不在酬獎理任之限仍

先停支官吏請給從之



欽定四庫全書

續資治通鑑長編卷二百九十五

宋 李燾 撰

神宗

元豐元年十二月辛丑朔詔提舉司天監集歷官考算  
遼高麗日本國歷與本朝奉元歷同異聞奏其後歷官  
趙延慶等言遼已未年氣朔與宣明歷合日本戊午年  
氣朔與遼歷相近高麗戊午年朔與奉元歷合其二十



四氣內有七氣時刻并逐月太陽過宮日數時刻不同  
壬寅詔轉運司管勾文字官舉京朝官知縣人并提刑  
司檢法官各不得隨本司出巡 詔都提舉市易司人

戶賒當已輸足本息者見欠罰息錢特蠲其半即輸本  
息未足與展限半年候足日亦依此

與明年正月八日所書更參考

權判兵部許將言開封府界五路保甲義勇支費止有  
所減兵級請受賞給并弓手雇錢等充用乞從本部委  
提點刑獄司取索應減錢糧及郊賞衣賜折支等通全

一年實數立額歲令所屬分四季撥與提點刑獄司除義勇保甲可用物外餘並變錢椿管支給歲終有餘即封椿從之御史何正臣言近奏檢正中書刑房文字杜紘頗僻害政聞刑房見行右諫議大夫呂公孺理雪失入死罪事而陰與芑苴往來慮別有請託兼聞公孺遣兵夫車乘多載酥梨送遺在京權要永興土產為之罄竭因緣騷擾乞下有司窮治詔公孺令陝西轉運司究實仍令杜紘具析以聞後紘具析公孺無理雪死罪

事近送梨四十顆酥三斤臣已遣人還之兼臣生平不識公孺未嘗有一字往還止因今送酥梨例得公狀見居家聽旨而轉運司亦言公孺所置酥梨及差兵卒視熙寧十年為多乃詔公孺罰銅十斤絃依舊供職御史黃廉言聞百姓傳澤妻常經開封府判狀以夫出外不知消息許令改嫁後判官蘇洵雇以為婢近因澤還家論理有司欲坐其妻之父罪而同列有疑之未決者案洵既是開封官屬必知澤妻妄乞改嫁而令人宛轉

雇買乞盡理推治詔權發遣開封府許將根究以聞仍  
權以判登聞檢院杜訢與消易任已而根究至該踈決  
乃止出消知壽州 詔諸軍軍使都頭以下並充兵額  
內人數正副指揮使以上於額外補置遇軍行分押諸  
隊令編敕所及殿前馬步軍司照會隊法修入已而上  
批將下諸軍擁隊如闕將校並以十將代之其將校依  
在京諸軍例額外補置令具人數進呈後樞密院以數  
奏詔并教閱廂界將校亦於額外補置 提點修完京

城所言修完畢功所差壕寨等人乞酬賞詔隨功力輕重與轉資減年支賜各有差

癸卯上批入內西頭供奉官吳遵道造軍器及御前工作十餘萬可減磨勘六年 詔三司給勾帖以提舉出賣解鹽司每歲合用鹽萬席令於解州池場搬請其所賣錢令封樁歲終具數以聞 江南東路提舉司言呂嘉問違法不依戶絕條以亡僧銀絹等給淨相乾明寺僧尼已牒江寧府根究又嘉問奏臣與江東監司等皆

有嫌隙嘗乞下別路差官根勘而近者勘司又追逮臣  
私家使令之人恐何琬等鍛煉未敢發遣已報制勘院  
為見聽朝旨竊慮琬等又誣臣拒抗乞早指揮移送又  
制勘院言追嘉問僕孫壽證僧子新入宅事嘉問輒占  
留不遣若每如此即猝難結絕乞罷嘉問潤州遣赴江  
寧府就劾詔送制勘院一處劾之其所追人令嘉問速

發遣

二年四月庚戌  
嘉問罷潤州

甲辰詔開封府界提點司諸路監司分決繫囚內干照

及事理輕者先斷遣 詔內藏庫副使權太原府路鈴

轄張世矩罷兼知火山軍河東都轉運司言準詔具土

人武臣知州軍者以聞而世矩乃占籍府州故也

四年四月

十七日出矩  
繫府州獄

開封府界提點司乞免封樁闕額禁軍

請受等詔惟錢特免之 樞密承旨司言準送下三司

狀在京禁軍闕額封樁請受內錢絹特免其斛斗惟米

可存留自餘衣賜等物並屬三司應副及小麥已無剩

數欲乞特免勘會府界軍士衣糧等自當依外處例封

椿其小麥如闕即令三司以細色糧充從之 是日二

府奏事語及淤田之利上曰大河源深流長皆山川膏腴滲漉故灌溉民田可以變斥鹵而為肥沃朕遣中使往取淤土親自嘗之極為細潤蓋上之欲愛利農民惻

怛如此

或于此附王孝先所申淤田費

乙巳詔自今諸路轉運司並罷兼提舉本路市易司

定州路安撫司言北界人于惟孝因傳達北界事為北人收捕甚急今乞歸明望朝廷憫其累報北事及嘗告



捕北界刺事人李景等特推恩詔于惟孝與三班差使  
充江南指使河北緣邊安撫司嘗獲邊民王習所市北  
界馬即送順義軍上曰聞北界賣馬人法皆死又徙其  
家屬自今如北界無移文可遣人於界首縱還毋問賣馬

者免令屠戮蕃民

此據墨本所記聖德朱本簽貼云移  
入契丹傳檢契丹傳乃無此又不知

是何年月姑附元豐元年十二月五日于惟孝下更須考詳

軍器監言廊延經略

使呂惠卿乞給新樣刀下江浙福建路製造及先乞甲  
身等以虎翼甲身應副詔止令內弓箭南庫給短刃刀

五萬五千口餘依奏 建州進士虞蕃上書言太學講  
官不公校試諸生升補有私驗且陛下辯色視朝而講  
官赴太學常以已入而午出陛下日攬萬幾經筵勸講  
尚不數年而書畢今講官講周禮七年纔及四卷又謂  
論語孟子道德之所在聖賢之所為陛下設科使參大  
經今未始有講乞令講官依諸司例早入監仍集諸生  
問答間日一升堂伏臘假不停說書及非假故毋因循  
廢講詔不公事委開封府根治以聞內申請事令國子

監主判官相度

劉摯疏云蕃以不得解  
故上書訟學官當考

丙午詔西作坊監弓弩作河南府右軍巡判官席延賞  
衝替以上批延賞近以造弓不如樣雖取戒勵未足示  
懲今再取弓三張皆本作自造而苦良相遠蓋惟聽匠  
者之所為不躬自省視職事曠弛不治可知宜令本監  
別精舉使臣監當故也

可并入已亥戒勵弓作官  
後已亥十一月二十九日

詔

給州助教敕告五十付陝西路都轉運司召人進納買  
九將什物等物料餘令轉運司應副仍展限通作三年

了足 鄜延路經略使呂惠卿言宥州牒請遣官與夏國邊官將蘇御帶分立文字依理識認并毀廢所侵耕生地及將西界前後逃背捉殺人馬界首交會本司近準朝旨定寫牒送馬五匹至宥州索所畧人馬及根治作過頭首誠斷上批宜先令河東經略司檢蘇安靜元與西人要約文字圓備仍除所差折固更選諳熟邊事信實使臣一人牒鄜延路令移報宥州約日與已差定官於界首各出文字理辯交會其諾爾一戶如是未叙

盟以前逃背于誓詔當給還即具以聞 知都水監丞

范子淵言奉詔相視導洛通汴自今河陰縣西十里簽河處步量至洛口地形西高東下可以行水乞差知水

事臣僚再案視詔左諫議大夫史館修撰直學士院安

燾入內都知張茂則同相視六月十五日可考二年六月十七日清汴成章傳作

記

詔應鄉村民願以所納義倉糧就便納縣倉者聽

從知管城縣趙燮請也本志不載請人此月十五日云云舊紀書此 是日

日中有黑子如李凡十三日乃散 龍圖閣直學士給

事中吳中復卒

戊申詔開封府界京東西將下兵每十人取一人令所  
差去教頭習馬射與免雜教其在京步人諸指揮弓箭  
手令殿前步軍司各選少壯有性格軍士十人付提舉  
教習馬軍所教習候教成遣歸元管軍司依見教軍馬  
法據見管人亦十人取一人展轉教習後上批在京弓  
箭手步人總五十八指揮今所教二十人充教頭實恐  
分教不給若俟展轉教習必遲久不能成就可再令每

指揮取二人如性格椎鈍難教即令逐時簡換 又詔  
內殿直以下諸班直闕額並據逐班直額管人數如闕  
二分以一分依例取簡增填餘一分內五釐以額外汎  
配人撥填五釐坐闕如闕二分以上準此若不及二分  
或雖及二分以上無額外汎配之人除例取簡一半增  
填外餘並坐闕 經制熙河路邊防財用司言本司推  
行事務各已有緒乞自明年管一路歲計用度詔其經  
制歲入若干以聞已而本司奏約以元豐二年所入錢

糧計一百餘萬貫石

熙河歲入貫石自元豐二年二月十八日丁巳移入此

詔

諸路將副聽比類熙寧附田令勅給職田正將視路分都監副將視藩府都監其青鄆州雖已撥黃河淤地及廢罷都監職田與將副而多寡未均並令改正 樞密

院言軍器監言河東路編排九軍會軍器當造竹長團排一千六百餘面緣工匠並造河北三州并鄜延路排別無作匠乞抽刷匠二百人應副仍候造三州并鄜延排了日併手製造詔軍器監馬軍團排止依見造竹排



樣步兵長排依今年正月所降樣許刷廂軍百人餘依所申

已酉分命輔臣禱雪于郊廟社稷 兩浙提舉司言浙西民戶富有物力自浙以東多以田產營生往年造簿山縣常以稅錢餘處即以物力推排不必齊以一法今欲通以田土物力稅錢苗米之類各以次推排隨便敷納役錢所費民力所出輕重均一從之

辛亥疎決在京繫囚雜犯死罪以下第降一等杖以下

釋之畿縣及三京諸縣準此 詔罷來歲元日朝會

壬子皇第七子建國公价卒年二歲贈太師尚書令追

封衛王謚悼惠其母邢婉儀也

兩紀並書卒

甲寅詔在京市易務上界勾當公事祕書丞應瑜減磨

勘一年三班借職李漸二年大理寺丞郭規轉一官減

磨勘一年杭州觀察支使董經換東頭供奉官各賜錢

有差並計息推賞也 詔大名府永濟鎮被水災醋戶

依酒場被水蠲買名錢

乙卯詔民納稅不及斗者免納義倉

本志有之  
此月六日

丙辰權御史中丞蔡確言河決曹村方議塞決口未定  
聞轉運使王居卿建橫埽之法決口斷流實獲其力而  
奏功之時居卿不欲自陳獨見漏落乞驗問居卿所置  
橫埽如有明效令都水監著以為法從之仍令修入靈  
津廟碑 詔青州民王贊貸死刺配鄰州牢城初贊父  
九思為楊五兒毆迫自縊死贊纔七歲常欲復讎而以  
幼未能至是十九歲以槍刺五兒斷其頭及手祭父墓

乃自首法當斬上以贊殺讎祭父又自歸罪可矜故也  
河北緣邊安撫司言準樞密院劄子保州諜知北界  
燕京留守司指揮容城歸信兩縣鈐束拒馬河南兩屬  
戶毋得納雄州貸糧事委本司考實如實即中書近降  
除放雄州歸信容城兩輸戶賑貸米指揮且未須施行  
本司勘會南北兩界凡賑濟兩輸戶及諸科率兩界官  
司承例互相止約其實彼此空文今北界亦止循緣舊  
例即非初始行移兼兩縣自九月起催至十一月中旬

纔納貸糧三十餘石自中旬北界止約至十二月中旬  
已納米萬餘石以此較之情實可見兼中書近奏兩輸  
戶納米數乞倚閣候秋料催納以寬下戶乞止依此奏  
施行從之

丁巳詔陝西路提舉鑄錢司支大銅錢十萬緡付轉運  
司市糧草上批按閱京東西將下諸軍已支銀器可令  
提點刑獄司計直以封樁闕額禁軍納絹折還

戊午以權知審刑院度支郎中崔台符為右諫議大夫

大理卿屯田郎中直史館權發遣江淮等路發運副使  
蹇周輔太常博士權判都水監楊汲為少卿丞及檢法  
官令舉官以聞先是上以國初廢大理獄非是

要見國初廢大

理獄事因

以問孫洙洙對合旨於是中書言奉詔開封府司

左右軍巡院刑獄皆本府公事而三司諸寺監等凡有  
禁繫並送三院繫囚猥多難以隔訊又盛暑疾氣熏染  
多致死亡官司各執所見吏屬苦于諮稟因緣留滯動  
涉歲時深為未便參稽故事宜屬理官今請復置大理

獄應三司及寺監等公事除本司公人杖笞罪非追究者隨處裁決餘並送大理獄結斷其應奏者并天下奏案並令刑部審刑院詳斷大理寺置卿一人少卿二人丞四人專主推鞠檢法官二人餘悉罷應合行事委本寺詳具以聞從之台符等既受命作大理寺凡十有七日而成十七日而成據李清臣記墨本所書不同朱本遂并削去新紀書以開封囚猥多復置大理獄

舊紀載詔語差詳

詔自今歲起發坊場錢更不寄納市易務

徑赴內藏庫寄帳封樁其逐路起發赴京支官員遠接

雇人并召募押網路費等錢于開封或祥符縣置庫仍舊令佐主之 開封府請修完京城四壁留十步以牆為衛外容車馬往來詔止于七步外築牆以所減三步外添兩步共留五步為路其官私舍屋有礙者即止據見今地于五步外築牆為路仍免毀拆 又詔真定府界塌崖嶺盜斫車輜者雅沁等三人別無意作過令放還北界 三司言準送下判都水監宋昌言等奏乞支錢二十萬緡分與開封府河北路諸埽市梢草今未有



錢物可給欲支市易務下界末鹽錢十萬緡從三司撥付本監依朝廷錢物例封樁仍逐年依數兌換非朝旨及埽岸危急不得支用從三司點檢拘轄從之

已未詔罷都大提舉在京諸司庫務司其所領事令三司分隸所屬又詔自今司農寺除本寺官請受及吏人衣糧食鹽依舊三司支給餘支本寺所管常平免役頭子感零等錢從判寺蔡確請也

壬戌檢正中書刑房公事杜紘罷檢正陞一任太常丞

監察御史裏行黃蘆為集賢校理並權判刑部蘆依舊  
同結絕御史臺根究公事 詔大理寺官吏并現在公

案等並歸刑部其當送大理獄結斷事自來年正月後  
依戊午詔施行 詔權荆湖北路轉運使太常少卿孫

頤以督捕詹遇等有勞特賜紫章服西京左藏庫使權  
荆湖北路都監彭孫設謀殺遇及獲婦女十八人馬七  
匹除崇儀使忠州刺史權發遣本路鈐轄仍賜錢五百  
千東作坊使權潭州鈐轄何次公捕獲賊黨三十四人

馬十六匹然先以不救應件全等見下孫頌劾罪候頌再奏到取裁其餘轉資減年及賜錢帛各有差御史

中丞蔡確言比聞有人偽作臣論科場文字騰播都下

御史黃廉已具奏蒙下有司購捕未獲聞所託文字久喧道路亦不難窮核但得傳道一人展轉推問必見所

歸望增立賞錢根究主名雖經疎決特賜重行以懲造

語作姦之風詔專令許懋根究增賞錢五百千

許懋明年十一月十一

月以前廣東憲乞籍五州丁為槍手不知今任何官

中書言江南東路制勘院

言根究呂嘉問等事候江西提點刑獄李茂直到院結案然茂直近已丁母憂詔止令孫珪王安上朱炎同鞫之

癸亥以翰林學士起居舍人兼侍讀權發遣開封府許將權知開封府中書言立大小使臣呈試弓馬藝業出官試格第一等步射一石發兩矢射親十中三馬射七斗發三矢馬上五種武藝問孫吳大義十通七時務邊防策五道文理優長律令大義十通七如中五事以

上與免短使減一任監當三事以上免短使陞半年名  
次兩事陞半年一事陞一季第二等步射八斗射親十  
中二馬射六斗馬上三種武藝孫吳義十通五策三道  
成文理律令義十通五如中五事以上與免短使陞半  
年三事以上陞半年兩事陞一季一事與出官第三等  
步射六斗射親十中一馬射五斗馬上兩種武藝孫吳  
義十通三策三道成文理律令義十通三計算錢穀文  
書五通三如中五事以上陞半年三事以上陞一季兩

事與出官從之

舊紀云癸亥詔武臣入流猥雜莅官從政無以甄別立試藝業法與實錄不同

新紀亦削去當考選舉志同選舉志云詔大使臣試弓馬藝業出官第一等步射一石矢十發三中馬射七斗

馬上五種武藝孫吳義十通七時務邊防策五道文理優長律令義十通七中五事以上免短使減一任監當

三事以上免短使陞半年名次兩事陞半年一事陞一季第二等步射八斗矢十發二中馬射六斗馬上三種

武藝孫吳義十通五策三道成文理律令義十通五中五事免短使陞半年三事陞半年兩事陞一季一事與

出官第三等步射六斗矢十發一中馬射五斗馬上兩種武藝孫吳義十通三策三道成文理律令義十通三

計算錢穀文書五通三中五事陞半年三事陞一季兩事俱出官其步射並發兩矢馬射發三矢皆著為格此

據本志增入志但稱元豐初敕

提舉司天監所言先被旨應館閣所

藏及私家所有陰陽之書並錄本校定置庫收掌今編成七百一十九卷乞上殿進呈從之

甲子婉儀邢氏進封賢妃妃乞免冊命詔止進告

兩紀並書

進位

詔罷三司推勛公事官減軍器監勾當公事審官

東院流內銓及將作監三班主簿左右軍巡判官各一

員又詔秦鳳路義勇保甲近已上番未差兵部官案

視慮官司推行法令不盡或有差違令同判兵部李深

往檢點以聞詔京東開封府界將下馬軍關馬逐將

召買四歲以上十歲以下堪被甲馬其錢於封樁禁軍  
闕額請受內借支 判大名府文彥博言據國子博士  
管勾外都水監丞耿琬妻安氏狀琬赴決口提舉兵夫  
至修閉畢工於靈平埽冒暑而死蒙賜絹二百匹乞免  
所賜特推恩子敏案耿琬實以勤事而死伏望特錄其  
子詔敏與郊社齋郎 引進副使京東西按閱將下馬  
步軍武藝張山甫等言京東第八將張建中所教兵衆  
比之諸將應格人數全少詔建中先衝替令轉運司體



量如有罪狀即劾以聞

乙丑詔熙河路經略司指揮熙州自今于開國入貢如實惟齋國王表及方物聽發赴闕仍毋得過五十人驢馬頭數準此餘勿解發止令熙州安泊差人管勾依條許令賣買仍婉順開諭除乳香以無用不許進奉及挾帶上京并諸處貨易外其餘物並依常進貢博賣

丙寅遼主遣寧昌軍節度使耶律隆太常少卿史館修撰王安期等來賀正旦

丁卯殿前副都指揮使建武節度使賈逵卒贈侍中謚武恪逵嘗請加贈三代上諭以當令有司檢會及是逵家又以請上批逵武人能念親不忘雖不該郊禮可特

許之

據御集逵先請乃十月十七日得請乃明年二月十五日今并書之

命西上閤門

使樞密院副都承旨張誠一兼都大提舉燕設諸司應奉事馬軍都指揮使楊遂權殿前副都指揮使梓州路轉運提點刑獄司夔路鈐轄司言甫望箇恕子乞弟領兵讎殺生界夷人請楊三班所許物詔轉運鈐轄

司以本司意諭乞弟昨官軍討夷賊其甫望箇恕能自  
撫遏部下夷衆把截地分不助羅胡苟等作過事以先

差楊舜之許與物數給賜仍為隄備毋少致侵犯

據平蠻錄

云遣招安將楊文簡與乞弟相約實錄乃云楊舜之今從實錄疑先遣文簡後存寶至又遣舜之也今不復出招安將姓名

先是轉運判官程之才言羅苟村部正扼烏蠻

出入道路近歲與蠻為讎蠻不敢肆若平羅苟乞於其  
地置寨以制烏蠻詔下存寶相度始轉運司經畫羅苟  
事乞弟遣其徒一毛至納溪寨乞率兵助漢轉運司遣

招安將報云不勞以兵來助若能撫遏諸夷擒捕羅苟  
餘黨送官官有賞若干存寶至復申行其說存寶既平  
羅苟止傍江置一寨以防拓羅苟而烏蠻道路蕩然無  
復控制又失給賞物及存寶分屯至梓遂間乞弟果以  
無羅苟梗路之虞遂率羅始党村并晏州水路十二村  
夷衆僅五六千人由涇灘峽往攻戎州界落廁賴陪等  
村及江安縣界七姓十九姓夷人燒蕩村園虜掠人畜  
刻牌強之俾輸以迴薄江安城下索存寶所許之賂縣

民驚擾知縣何宗範嚴備而告語之凡三日乃去留蠻  
判羅一蠻奴一毛以一魚一馬謝宗範迴過夷牢村一  
毛為夷衆所殺羅一復奔縣求送歸縣以其本漢逃卒  
遂械禁之聞州州聞轉運鈐轄司鈐轄司聞朝廷獄成  
而斬之烏蠻知命自朝廷不敢以為怨止稱殺我一毛  
者夷牢夷人也

元豐三年四月二十六日實錄載乞弟  
犯江安事迹與平蠻錄有不同處當參

考別  
修

是歲宗室子賜名授官者五十人 天下上戶部主戶

一千九十九萬五千一百三十三丁一千六百五十一萬一千六十一客戶五百四十九萬七千四百九十八丁七百八十一萬五千四十一斷大辟一千一百四

人詔畿內及京東西五路許賣晉隰礬陝西自潼關

以西黃河以南達于京西均房襄鄧金州則售坊州礬

礬之出于西山保霸州者售于成都梓州路出無為軍

者餘路售之禁私鬻者與越界者如私礬法

食貨志係之元豐元

年今附  
年末

上每憤北人倔强慨然有恢復幽燕之志即

景福殿庫聚金帛為兵費是年始更庫名自製詩以揭之曰五季失圖獬豸孔熾藝祖造邦思有懲艾爰設內府基以募士曾孫保之敢忘厥志凡三十三庫後積羨

贏又揭以詩曰每處夕惕心妄意遵遺業顧予不武姿

何日成戎捷據食貨志以詩更庫名實元豐元年今附  
年末仍取墨本元豐八年史臣叙聖德篇

補贈  
飾之

欽定四庫全書

史部

續資治通鑑長編卷二百九十六

詳校官檢討

臣

劉錫五

刑部郎中

臣

許兆椿覆勘

纂修官修撰

臣

黃

軒

謄錄舉人

臣

黃通

熒



欽定四庫全書

續資治通鑑長編卷二百九十六

宋 李燾 撰

神宗

元豐二年春正月癸酉詔北京澶定州封樁糧六百七十餘萬石草千七百餘萬束今後如與轉運司兌換即對見在數交割仍委安撫司專領之

乙亥西上閣門使韓存寶為西方館使忠州團練使初

薛向與呂公著並命入樞府向事公著甚恭既久公著亦稍親之議論頗相左右存寶將陝西兵平瀘州叛夷上欲優進官秩以勸立功者向曰瀘州本無事今優賞存寶後有立功大於存寶者何以加之公著曰薛向言是也上從之 罷寄嵐火山軍市馬先是邊臣建議二軍市土產馬以廣戰騎既而北界移文稱邊人多盜馬過界中賣故罷之

丙子詔舊明州括索自來入高麗商人財本及五千緡

以上者令明州籍其姓名召保識歲許出引發船二隻  
往交易非違禁物仍次年即回其發無引船者依盜販  
法先是禁私販高麗者然不能絕至是復與中國通故  
立是法 光祿寺丞詳定說文陸佃兼詳定郊廟奉祀  
禮文

己卯命翰林學士權知開封府許將權知禮部貢舉知  
制誥蒲宗孟天章閣侍講兼直舍人院沈季長權同知  
貢舉 天章閣待制李肅之權發遣開封府肅之辭疾

以樞密直學士錢藻代之

藻命在丁亥今并書

遣判都水監王

令圖往視河役以是歲役夫倍多也

詔利州路轉運

使劉忱選官劾梓州路轉運判官程之才與知瀘州任

伋互論訟事伋以不能撫遏措置蠻事仍先差替伋再

任瀘州熊本薦也始之才欲用兵討羅苟夷伋以為羅

苟本熟戶因求骨價侵擾境上與生夷反叛不同可招

納之若遽加以兵彼窮迫無所竄伏轉投生界則甫望

箇怨諸部更相連結益鴟張難制邊患自此始矣之才

不聽因檄仍無得與兵議仍遂疏之才不法事關瀘州十五條上之既而乞弟果入寇之才遽劾乞弟過江安時仍不即掩擊并他不法事朝廷疑之於是先罷仍而

委忱究兩人曲直

仍見元年二月二十四日二年二月十三日減磨勘年泰觀集可考

詔以提舉出賣解鹽司錢十三萬八千二百四十餘緡給開封府提典司糴軍儲 詔市易司罷立保賒錢法

已出錢立輸限如半年內輸本息足者蠲其出限罰息錢物力雖薄而有營運者量力支借毋過舊數三之一

令元體量檢估官分認催收限三年結絕歲具所收錢數比較賞罰專委勾當公事官一員催驅其自今用產業抵當者並拘留契書歲收息一分半檢估官吏如容增直冒請以違制論不以去官赦降原減其賒請物且如舊法檢估本家物力所請不得過所有之半

去年十一月十

一日壬子王居卿已嘗建議又十二月二日壬寅詔當考

市易舊法聽人賒錢以田

宅或金銀為抵當無抵當者三人相保則給之皆出息十分之二過期不輸息外每月更罰錢百分之二貧人

及無賴子弟多取官貨不能償積息罰愈滋囚繫督責  
徒存虛數實不可得於是都提舉市易王居卿建議以  
田宅金帛抵當者減其息無抵當徒相保者不復給自  
元豐二年正月七日以前本息之外所負罰錢悉蠲之  
凡數十萬緡負本息者延期半年衆議頗以為愜此據司馬  
光記聞二月十九日當考詔舊隸三司寺監承受斷遣或送府司  
軍巡院禁勘公事并提點倉場司四排岸司徒以下罪  
及合追究公事舊送三司者送大理寺從本寺請也

詔陳士儒母被害事送大理寺以御史黃廉言開封府

不効正士儒知情移勘故也

初送開封元年六月是年八月壬子又移御史臺

詔樞密都承旨韓績副都承旨張誠一可檢會供職

歲月取旨績尋除龍圖閣直學士誠一除四方館使

御集

正月九日事

詔樞密副都承旨張誠一已差都大提舉宴

設諸司其上元節車駕登門及行幸燕所並令提舉幾

察詔以太皇太后服藥有効醫官朱有章秦迪亢常

沈士安各與一子若孫遷官陳易簡授遙郡刺史



壬午馬軍副都指揮使容州觀察使楊遂為殿前副都

指揮使寧遠軍節度使

舊紀書此

太常博士檢詳樞密院

禮房文字王伯虎為館閣校勘

御史何正臣言赴太

廟監察攝太尉豫章郡王宗諤遣吏傳言有負屈事案

宗諤親則近屬爵為郡王安得更更有抑屈事就使有之

不訴於廟廷而訴於臣且方齋祠輒語及此望付有司

治其罪詔大宗正司劾罪後大宗正司言宗諤三問不

承詔罰銅二十斤

梓夔路鈐轄司言知歸徠州甫望

箇恕死請以其子乞弟承襲從之

癸未詔知沅州謝麟監督討捕湖北路猺賊

甲申詔司農寺市易淤田水利司封椿糧斛並兌換與

河北糴便司更不計置

本志係此事於五年恐誤也今依實錄四年三月八日戊戌可

考

丁亥以知府州折克柔弟西頭供奉官克行為禮賓使

知府州先是克柔以目病乞致仕仍乞以克行承襲詔

克柔與宮觀差遣而有是命克行繼閔子也 封皇太

后乳母永嘉郡夫人賈氏為燕國夫人 詔諸路修城

於中等以上戶均出役夫夫出百錢其役廣戶狹處以  
五年分五限餘以三年分三限送官官為相度募人或  
量增役兵蕪築如錢不足預具數以聞遇災傷及三分  
年仍權住輸錢 詔宗室大將軍以下願試者本經及  
論語孟子大義共六道論一首大義以五通論以辭理  
通為合格

二紀並書立宗  
室試經義論法

知大理卿崔台符言乞自

今大理勘事內有情法不稱者許以三司條例斷奏事

若重審仍依審刑院三司開封府例上殿奏裁從之

降右諫議大夫蘇頌為祕書監集賢院學士知濠州司  
門員外郎徐大方奪兩官虞部員外郎孫純奪一官並  
勒停降國子博士許彥先監吉州酒稅初同文館鞠純  
私貸官錢事頌坐失出杖罪御史舒亶駁奏以謂純與  
頌實為近親不可以失論故雖會降當釋特責之大理  
少卿韓晉卿呂孝廉坐理斷不當各罰銅二十斤

晉卿等罰

銅乃三月二日庚午今并書舊紀書右諫議大夫蘇頌  
蔽官屬貸僧錢罷知開封府降為祕書監知濠州新紀

不  
書

戊子手詔大理寺日者修舉墜典釐正職業俾治官府  
獄事前代章程湮滅歲久不可復知今所圖畫皆以義  
起椎輪規摹不少寬假必難稱辦苟官吏各懷顧忌於  
驅遣之際或致逡巡則稽留弊害無異前者其本寺承  
事勘鞫可且依准制院又御史臺例不供報糾察司斷  
訖徒以上旬具犯由申中書樞密院刑房俟置司及一  
年別取旨其後及一年乃復詔依開封府例供報糾察

司御史何正臣言熙寧元年禮部試上舍生並於試  
卷印特免字恐於考較不合公議今上舍赴禮部試乞  
更不印號從之

己丑資政殿大學士右諫議大夫知杭州趙抃為太子  
少保致仕

辛卯權發遣利州路提點刑獄太常博士呂開權知戎  
州開自利路提刑知戎州  
必有故當考無則削去大理評事元耆寧為崇文

院校書同知禮院以上批參知政事元絳子耆寧訪於

士人多其孝謹觀所為文頗亦典瞻故也先是上元張  
燈執政諸子皆出遊而耆寧少多病獨不出上喜察聽  
外事對輔臣稱獎之以為好學勤篤因有是命 上批  
侍衛步軍并軍頭引見司所管東京司備軍借事聞自  
來差科無優重之別勞逸偏頗一出於主轄官受禱私  
意間雖有守公之人亦患無法守以拒干請宜依昨詳  
定刺員差科例委燕達具約束條目送承旨司看詳聞  
奏頒降其備軍借事仍並隸步軍司差使 詔荆湖南

路轉運司罷置潭州樓櫓其修城限五年全邵州限三年畢工役兵不足許募民夫 上批直翰林醫官院沈士安醫學吳有成治嘉王顥疾有勞士安候遷副使減磨勘二年有成特遷一官

壬辰詔三司出銀紬絹及末鹽錢二十萬緡賜河北轉運司以糴軍儲

癸巳上批聞陝西河北京東自去冬無雪可令轉運司訪名山靈祠祈禱 又批聞階成州去後災傷難食之



民流者未止官司初不經畫賑濟可下司農寺并本路  
提舉司速施行 三司請應增祿行倉法人但有職事  
在手如敢詐欺財物及借使錢物典質之類罪賞並依  
倉法內被詐者不坐如能自告亦依重法賞之詔詳定  
重修編勅所立法編勅所言應行重法人借使錢物之  
類當依取受科罪若本職相干公事雖有過之後而受  
者亦合依重法施行其因賣買以取剌利并借使之類  
還訖而事發者尚未有法今定依取受條還訖事發減

五等家人減身犯二等坐之其監司吏人委逐司互覺  
察從之

甲午詔安南瘴死官吏物令轉運司具數及物主名以  
聞 詔辰州叙浦縣置龍潭堡差戍兵及土丁各五十  
人巡檢使臣一員從湖北路都鈐轄司請也 京兆府  
學教授蔣夔言春秋釋奠以孔子為先聖顏子為先師  
先聖之樽在西先師之樽在東肆祭器實牲體盥手濯  
爵奠幣讀祝拜跪登降進退之節與孔子無少異而九

人之像坐于兩旁樽酒豆肉不及焉臣愚不識為是禮者何以處之且孔子師也顏子雖大賢與九人者徒也今推顏子以配享孔子而其禮均九人者獨不與享以孔子為先聖顏子為先師而師名故不及於孔子蓋緣唐開元禮爾開元禮因革損益之不得其當者非徒此也乞下臣議於禮官取開元釋奠儀詳定可曰充國公顏子母稱先師母讀祝其祭器牲體薦享祝獻之儀一切降殺母擬於其師而進九人亦在祀典顏子降於孔

子九人降於顏子以正開元之失禮詔禮院詳定禮官  
言唐顯慶二年長孫無忌議按永徽之令改周公為先  
聖孔子為先師顏回邱明並為從祀謹案禮記凡學春  
官釋奠于其先師鄭康成注先師若漢禮有高堂生樂  
有制氏詩有毛公書有伏生可以為師者又記曰始立  
學釋奠于先聖鄭注曰若周公孔子也據禮為定昭然  
自別聖則非周即孔師則偏善一經漢魏以來取舍各  
異顏回夫子互作先師宣父周公迭為先聖所以貞觀

之末親降綸言今請改令從詔於義為允從之今看詳  
孔子顏子稱號歷代各有據依難輒更改並配享正享  
禮意本一儀物祝獻亦難降殺所乞進九人亦在祀典  
蓋州縣舊釋奠儀未有十哲從祀之文檢會熙寧祀儀  
十哲皆為從祀各設籩二豆二俎簋簠爵各一命官分  
獻一奠而止乞自今三京及諸州文宣王廟十哲像春  
秋釋奠並準熙寧祀儀從之

朱本云將護言事並無施行亦無義理合刪去今依

墨本

乙未寶文閣待制權三司使李承之為龍圖閣直學士  
上批承之赴司供職已及一年八月特有是命承之少  
鞠於兄肅之及長事之如父愛其子如己子凡恩補率  
先及之及是懇辭學士乞以授肅之且曰臣兄為待制  
二十年矣上曰卿兄弟孝友足勵風俗肅之亦當遷也  
居五月授肅之龍圖閣直學士

肅之授直學士在六月  
傳云即並命之誤也

詔諸州軍祠祭齋醮祈禱舊差長吏出城經宿者自  
今以通判代行

丙申上謂輔臣曰向以陝西用度不足出鈔稍多而鈔  
加賤遂建京師買鹽鈔之法本欲權鹽價飛錢於塞下  
而出鈔付陝西無止法都內凡出錢五百萬緡卒不能  
救鈔法之弊蓋新進之人輕議更法其後見法不可行  
猶遂非憚改王珪曰利不百不變法上曰大抵均輸之  
法如齊之管仲漢之桑弘羊唐之劉晏其才智僅能推  
行況其下者乎朝廷措置經始所當重惜雖少年所不  
快意然於國計甚便姑靜以待之

新進輕議改法當考  
或與沈括相關本志

甚畧已附注熙寧十年二月二十七日今用實錄正文并實訓

以鎮南軍節度推官

彭持為著作佐郎持提舉兩浙市易司歲餘收息錢十九萬緡特賞之

丁酉置大理寺勾當公事官二員以大小使臣充詔

大理少卿資任視三司判官丞視轉運判官文彥博

言騎捷副指揮使李成往年破貝州功第一兼武藝精

熟乞令詣闕呈試換一前班從之詔閣門祇候趙戡

押賜夏國主中冬時服輒收接蕃書令開封府劾罪



戊戌左藏庫使李希一為永興軍路鈐轄希一初授本  
路都監自陳乞一路分鈐轄上批希一累經外任恐自  
當陞鈐轄可具資序進呈遂命之 賜度僧牒百修明  
州城 相州安陽縣民段簡以父兩目失明斷臂取骨  
髓飲父父目復常

二月庚子朔詔保州作院募民為工匠其給銀鞋錢及  
南郊賞賜視廂軍以諸州軍作院所給舊並係廂軍投  
換故也

辛丑經制熙河路邊防財用司言蕃官內藏庫使李楞  
占納支等乞助築熙州外城從之仍日給運土人米一  
升毋得抑勒科定赴役人數明年築河岷州蕃官趙醇  
忠趙結成瑪皆以夫助城亦給之 馬軍都虞候燕達

言內外諸軍拍試教閱弩乞許用鐵臂鉤踏射不用包  
指鐵臂鉤在手腕之上踏硬取力比之包指頗加斗力  
便於施放仍遇敵相近執持刀杖無所妨礙從之後詔  
諸軍用鐵臂鉤踏射者各於斗力外加三斗

壬寅詔自今帶御器械遇獨員差內侍押班兼權進  
嬖好宋氏為充媛 上批審刑院刑部乞因併差詳議  
詳斷官入試院積未斷公案凡五百餘道罪人幽繫圜  
牆日夜待命豈宜淹滯留壅如此其自今月三日後官  
吏並勒宿

癸卯詔聞濱棣德博州盜發相仍令提點刑獄汪輔之  
督捕無致結集如捕盜官弛慢劾罪以聞 又詔定公  
使錢三司開封府歲萬緡司農寺三千五百緡將作監



三千緡都水監二千五百緡羣牧司軍器監都提舉市  
易司各二千緡兵部千五百緡刑部除舊大理寺月支  
錢外千緡國子監七百緡並自今年始其不該裁定處  
依舊

甲辰詔威茂黎三州罷行義倉法初知興州羅觀乞置  
義倉於川峽四路許之既而成都府路提舉司言威茂  
黎三州夷夏雜居稅賦不多舊不推行新法歲計軍儲  
皆轉運司支移彭蜀州稅米就輸及募人入中恐不可

置義倉故有是命 又詔諸王宮教授自今不許過兩

任 又詔近已罷都大提舉在京諸司庫務司其所隸

庫務令三司副使判官勾當公事分季點檢申中書

乙巳審刑院刑部請以審官東院地為審刑院太常禮  
院地為刑部詳斷司從之 太常丞集賢校理顧臨權

發遣開封府推官太子中允直集賢院開封府推官范

育依舊為樞密院檢詳官 十七日臨罷府推呂公著云云 詔河北東

路提舉司借常平錢四萬緡分給大名府澶州糴軍糧

丙午河東經畧司言大山軍巡檢韓渭擅領兵士入北  
界與北人相射及誘致蕃部至廨宇待以客禮詔渭衝  
替令轉運司劾罪 詔皇太后姪禮賓使榮州刺史高  
公紀久疾在告可罷勾當三司衙司差提點崇先觀免  
日赴起居

丁未詔知南劍州萬公儀追一官免勒停通判黃子春  
知邵武軍周約簽判李上僨各罰銅二十斤差替其餘  
巡檢巡茶鹽縣令尉追官勒停罰銅衝替者凡二十九

人並坐賊廖恩經所部不覺察及討捕無功雖會赦降去官猶責及之 太常丞程顥判武學

十五日顥罷呂公著云云

庚戌計議措置邊防公事所言以環慶路正兵漢蕃弓箭手強人聯為八將第一將駐慶州第二將環州第三將大順城第四將淮安鎮第五將業樂鎮第六將木波鎮第七將永和寨第八將邠州從之 詔梓州路轉運使高秉判官程之才各陞一任以討瀘州夷事饋運有勞也 詔聞瀕隸滄州昨因災傷至今民尚乏食其令

提舉官李孝純存卹有合行事行訖以聞事體稍重者奏聽旨察知縣縣令有不職者權對移

辛亥知越州給事中集賢殿修撰程師孟降為右諫議大夫坐前知廣州失入市易牙人杖罪及斷割牙錢不當也 荆湖北路都鈐轄司言辰州本斗堡斬獲蠻賊十首級其餘殺戮甚衆殘黨窮迫亡散類皆卑弱其有能自歸者欲誠約遣還以示威信詔自歸者貸其死毋給賞令仍舊住坐 詔聞齊充濟鄆州穀價貴甚斗直



幾二百萬食流轉之民頗多司農寺其諭州縣以所積  
常平倉穀通同比元入價斗虧不及十錢即分場廣糶  
濱棣滄州亦然三司又言齊淄等州穀貴春夏之交慮  
更艱食請輟廣濟河所漕穀二十萬石減價出糶所糶  
錢發上京理為年額從之 詔禮部下第進士七舉諸

科八舉曾經殿試進士九舉諸科十舉曾經禮部試年  
四十以上進士五舉諸科六舉曾經殿試進士六舉諸  
科七舉曾經禮部試年五十以上者聽就殿試內三路

人第減一舉皇祐元年以前禮部進士兩舉諸科三舉  
準此仍不限年其進士一舉諸科二舉年六十以上者  
特推恩又詔開封府國子監間歲考場以前到禮部進  
士五舉諸科六舉年五十以上許就殿試又詔朱墨本  
並於三月一  
日重出  
今削去上批京東淮南兩浙路應副高麗貢使什物  
可逐路委一監司主領禁毋他用

壬子梓州路轉運司言去年十一月蠻乞弟率衆犯邊  
縱火掠人雖已遁歸慮復來寇乞增禁軍及召施黔州

義軍赴江安縣納溪寨為守備候團結夷人子弟可用  
及邊事帖息漸減放從之仍令留黔州義軍二百人月  
給糧米一石 職方郎中知瀘州任仍減磨勘二年以  
韓存寶言討夷人仍宣力故也

正月九日仍已差替今  
猶以知瀘州減年當考

端明殿學士兼翰林侍讀學士提舉崇福宮司馬光  
言同編修資治通鑑范祖禹已改京官罷任乞留在局  
編修從之 詔開封府界提點提舉司京東河北路轉  
運提舉司權住催理第四等以下戶逋負俟夏熟日輸

納仍令河北轉運司具災傷州縣見催殘零逋負各是  
何官司錢物所負若干數以聞

癸丑復太常少卿知澶州韓璠為右諫議大夫仍再任  
璠先坐失舉人追官一期當叙而知諫院黃履言璠治  
郡又治決河最有功故有是命 上批瀘州蠻乞弟雖  
叢爾小醜不足深憂然彼方武備不修兵力疲軟守具  
殘缺使賊知我虛實猖狂豕突過江即便至瀘州城下  
或守吏寡謀小有差跌則一路惶駭旁郡兵既難於救

援邈迨之間遂成巨患今雖從京已發步軍兩指揮然  
道里遼遠到未有期可就近選發秦鳳路下番土軍步  
人兩指揮

甲寅罷程顥判武學以御史何正臣言顥學術迂濶趨  
向僻異故也後二日又罷顧臨開封府推官令仍舊判  
武學臨受命踰旬顥才八日也同知樞密院呂公著言  
臣聞臯陶陳謨以知人為難孟子論道以知言為要所  
謂知人則哲能官人何憂乎驩兜何畏乎巧言令色孔

士者知人也諛辭知其所蔽淫辭知其所陷邪辭知其所離遁辭知其所窮者知言也故曰帝王之德莫大乎知人而成敗之機在於察言是以堯舜在上明目達聰詢四岳以難士人命納言以聖讒說使惡直醜正者不能亂天下之俗服讒蒐慝者不能遷人主之意然後四門穆穆而朝廷清明權歸於上而天下無事臣向蒙陛下擢在樞府中謝日不敢縷陳細務輒論及判別忠邪之道嘗謂陛下勵精為治十年不懈小大政事日欲增

葺而朝廷之間邪說尚勝大抵小人之害君子必求要切之語以中之使之不能自解方朝廷修改法度之初凡在朝野孰無論議陛下聖度兼包豈悉記錄而小人賊害指目未已苟昔有異同之論而今不為言者所容則必指以為沮壞法度之人不可復用非陛下加意省察則端人良士類遭排格當時粗陳此論陛下頗賜開納近日除顧臨開封府推官程顥判武學搢紳聞之皆以為顥昔任御史嘗有所言陛下不以為過而稍用之

知朝廷用人不終遺棄必料傳之四方士人無不欣仰  
然命下數日復因言者而罷去則知臣前所陳者其風  
猶未殄也臣實不佞嘗為一二識者私道陛下聖德竊  
以為陛下春秋鼎盛履崇高之位操生殺之柄而記人  
之功忘人之過極天地山海之量此羣下所以愛戴而  
人人願立於朝也小大之臣雖姦回頗僻如鄧綰者猶  
降責不踰年遽復侍從授以方面則是盛明之世本無  
棄絕之人邪正賢不肖亦未易以一言而定也臣愚以



謂今日公卿士大夫嘗於朝廷法令有所可否然其愛  
君許國之心愈久而益明者甚多其唱和雷同承迎附  
會而姦言污行卒為陛下所照者蓋亦不少然則人固  
未易知士亦不可忽也況如顥者陛下早自知之其立  
身行己素有本末講學論議久益疏通且其在言路日  
時有論列皆辭意忠厚不失臣子之體使得復見用於  
聖世其奮身報國未必在時輩之後兼所除武學差遣  
亦未為仕宦之要津而小人斷斷必以為不可者直欲

深梗正路廣沮善人其所措意非特一二人而已臣區區所慮者讒說殄行之徒日以熾盛則守正向公之士愈難自立其於聖政不為無損臣受恩與常人不同苟有所當言者不敢顧避緘默以負陛下優遇惟陛下幸察 詔大理寺官屬可依御史臺例禁出謁及見賓客 成都府路提舉言漢州自熙寧七年災傷戶絕之家有暴骸未葬者三十四戶九十八人乞人給錢二千收瘞鬻絕戶田宅以償官從之

朱史簽貼云此事至小無賣本人戶絕田產收葬自

有編敕正條合刪  
去新史復存之

日中有黑子如李凡十日乃散

舊紀

書此新紀不  
書散日志同

乙卯詔乞弟如再犯省地委王光祖與捕盜官分兵進  
討令有所懲艾毋得縱其焚掠仍令轉運司協力經制  
又詔充鄆齊濟濱棣德博州飢甚艱食之民頗多可

遣官分往諸州益募民為兵以補開封府界京東京西  
將兵闕額 上批殿前馬軍司同提舉教習軍馬所已  
拍試限滿依前不入等兵級可並與本軍合入退軍以

楊遂等言捧日龍衛三十二指揮內二百一十人展季已滿所習弓箭猶未入等故也 命左藏庫副使張克明簡奉先兵級以補轉員軍分克明任永定陵都監回建言乞升簡故有是命 知大理卿崔台符言流以下罪長貳親錄問決遣其大辟罪乞牒御史臺選差曾任親民常參官一員審問即特旨推勘罪至大辟或命官即臨時取旨差官詔大辟罪牒御史臺差官赴糾察司審覆餘如所請後又詔報御史臺差官同糾察司就寺

審覆

舊紀書詔大理決重辟御史臺同糾察司審覆新紀不書

丙辰判國子監李定言直講以傳授經術為職乞不令管規矩事從之 詔解池鹽歲以二百四十二萬緡為

額自明年始其歲增錢十二萬緡半令三司封椿半與陝西轉運司移用先是解鹽鈔分東西西鹽止得賣於所定地又並邊州軍市芻糧給鈔過多故鈔及鹽皆賤而難售商旅不行官價自分而為二於是三司及制置解鹽司言東鹽價重西鹽價輕請放西鹽得自便而增

其價與東鹽等以平鈔法歲可增十二萬緡後給鈔更不分東西關渡西鹽約束悉廢省並從之解池鹽鈔舊以二百二十萬緡為額至轉運使皮公弼請增十萬以助邊糴至是為二百四十二萬三司又言商人已請出

西鹽宜令貼納虧官錢使與新法價平亦如其請

食貨志載

此段自先是以下與實錄同已附注熙寧十年二月七日沈括自誌為鹽蠹者其說有四此其第三說也四說已附熙寧十年二月二十七日按括自誌則為三司使實行其說今括於十年七月九日罷實錄乃載此事於元豐二年二月不知何也

丁巳詔河北京東河東陝西久不雨可分遣禮官禱於  
東西北嶽五臺山 著作佐郎司農寺主簿黃顏為太  
子中允兼監察御史裏行 贈馮翊郡君連氏為美人  
連氏仁宗朝內人也 詔成都府鈐轄寄任頗重與他  
路不同其知府處置鈐轄司職事自今並須參議於接  
待儀範並依蔡延慶未到任以前體例毋輒裁損座次  
與監司依熙寧附令敕施行仍罷與本路通判序官指  
揮初成都兩鈐轄謁知府止循廊及退即廳堦上馬至

蔡延慶以帶都鈐轄仍令趙堦仍不上馬馮京以前執

政帶安撫使其禮遇頗殺或以為言故降是詔

墨本趙抃馮京

以前執政為安撫使故見鈐轄儀稍殺未改之今刪取修潤

馬軍司言雲騎軍闕

二千一百十五人詔於雲捷等軍選補 又詔川峽四

路武寧指揮本教閱廂軍昨升為禁軍其於廂軍舊額

除之

戊午詔應置市易務處賒請錢並依在京市易務法聽

以金銀物帛抵當收息毋過一分二釐

正月九日詔并王居卿云云又



三年九月五  
日皆當考

庚申詔近詔北界歸明人守官致仕分司及牙校軍民  
僧人各具所在并元歸明年月見今職位姓名奏上其  
西界投來及送到人口準此所有西北界入漢地作過  
編配人數亦令具年月及所在以聞 詔入內東頭供  
奉官宋用臣不須候盧秉押米運到京及今河水未通

先往案視導洛通汴利害以聞

元年十二月六日初遣  
安燾二年三月二十一

日罷  
盧秉

又詔諸路方春闕雨慮生蝗蝻害田其令河北

陝西京東西等路監司常戒州縣撲滅毋致滋生

乙丑知滄州張問言民飢至相食今州倉大豆四萬九千餘石可支五年漸有陳腐乞留支二年外斥其餘以賜飢民可活良民三萬口上批可下提舉常平事李孝純速相度施行訖聞奏

戊辰詔增監察御史裏行何正臣舒亶同鞫太學獄

綱要

云生不許接見賓客從御史臺請也

太學獄初送間封在元年十二月五

虞蓐日不知何時移御史臺此年三月一日五月十七日可考

經制熙河路邊防財用

司言十事乞收熙河岷州通遠軍官員職田以募弓箭  
手視逐官元給頃畝每頃歲給本司錢十千一也已拘  
收三州一軍公使醋坊歸本司資助請以逐處月收課  
利約定監官三等食錢月終紐計於醋坊淨利錢內納  
給二也岷州鹽官鎮通遠軍鹽川寨兩鹽場近撥屬本  
司歲入增羨乞自今年別立界歲終較其登耗以施賞  
罰三也鳳翔府增置市易務與秦熙等五市易務相為  
表裏移用變易四也本路州軍歲遣官置場和糴遇穀

價貴即出糶收息乞視所收息錢萬緡以上與減磨勘  
一年內選人免試與優便差遣每二萬緡循一資五也  
四市易務各增監官一員兼領市糶可減罷本司準備  
差使四人六也通遠軍威遠寨錢監改鑄銅錢罷鳳翔  
府郿縣勑置錢監七也秦鳳路坑冶如不許本司經制  
乞令轉運司撥還已興置本錢如許經制乞發遣陳述  
坑冶選人楊徽赴本司其坑冶如係本司勑置並乞隸  
屬本司八也岷州康川荔川閬川寨通遠熟羊寨乞置

牧養十監募兵為監牧指揮其營田乞依官莊例募永  
濟卒二百人其永濟卒通以千人為額以十六官莊四  
營田工役其請給並從本司自辦九也遇急乞依茶場  
司例許權差待闕得替官勾當十也又言乞築河州西  
原北河堡並從之 廢鼎州白埽黃石二寨

--	--	--	--	--	--	--	--